

唐·李白、王维 五言绝句各 32 首

静夜思

床前明月光，疑是地上霜，
举头望明月，低头思故乡。

怨情

美人卷珠帘，深坐颦蛾眉。
但见泪痕湿，不知心恨谁。

王昭君（其二）

昭君拂玉鞍，上马啼红颜。
今日汉宫人，明朝胡地妾。

玉阶怨

玉阶生白露，夜久侵罗袜。
却下水晶帘，玲珑望秋月。

独坐敬亭山

众鸟高飞尽，孤云独去闲。
相看两不厌，唯有敬亭山。

夜宿山寺

危楼高百尺，手可摘星辰。
不敢高声语，恐惊天上人。

相思

红豆生南国，春来发几枝？
愿君多采撷，此物最相思。

息夫人

莫以今时宠，能忘旧日恩。
看花满眼泪，不共楚王言。

班婕妤（其二）

宫殿生秋草，君王恩幸疏。
那堪闻凤吹，门外度金舆。

杂诗（其一）

家住孟津河，门对孟津口。
常有江南船，寄书家中否？

杂诗（其二）

君自故乡来，应知故乡事。
来日绮窗前，寒梅著花未？

杂诗（其三）

已见寒梅发，复闻啼鸟声。
心心视春草，畏向玉阶生。

劳劳亭

天下伤心处，劳劳送客亭。
春风知别苦，不遣柳条青。

忆东山（其一）

不向东山久，蔷薇几度花。
白云还自散，明月落谁家。

陪侍郎叔游洞庭醉后（其三）

划却君山好，平铺湘水流。
巴陵无限酒，醉杀洞庭秋。

夜下征虏亭

船下广陵去，月明征虏亭。
山花如绣颊，江火似流萤。

巴女词

巴水急如箭，巴船去若飞。
十月三千里，郎行几岁归。

自遣

对酒不觉暝，落花盈我衣。
醉起步溪月，鸟还人亦稀。

渌水曲

渌水明秋日，南湖采白萍。
荷花娇欲语，愁杀荡舟人。

山中送别

山中相送罢，日暮掩柴扉。
春草明年绿，王孙归不归？

山中

荆溪白石出，天寒红叶稀。
山路元无雨，空翠湿人衣。

书事

轻阴阁小雨，深院昼慵开。
坐看苍苔色，欲上人衣来。

红牡丹

绿艳闲且静，红衣浅复深。
花心愁欲断，春色岂知心。

山茱萸

朱实山下开，清香寒更发。
幸与丛桂花，窗前向秋月。

答裴迪辋口遇雨忆终南山之作

淼淼寒流广，苍苍秋雨晦。
君问终南山，心知白云外。

皇甫岳云溪杂题·鸟鸣涧

人闲桂花落，夜静春山空。
月出惊山鸟，时鸣春涧中。

送陆判官往琵琶峡

水国秋风夜，殊非远别时。
长安如梦里，何日是归期。

秋浦歌（其五）

秋浦多白猿，超腾若飞雪。
牵引条上儿，饮弄水中月。

秋浦歌（其六）

愁作秋浦客，强看秋浦花。
山川如剡县，风日似长沙。

秋浦歌（其十一）

逻人横鸟道，江祖出鱼梁。
水急客舟疾，山花拂面香。

秋浦歌（其十三）

渌水净素月，月明白鹭飞。
郎听采菱女，一道夜歌归。

秋浦歌（其十四）

炉火照天地，红星乱紫烟。
赧郎明月夜，歌曲动寒川。

秋浦歌（其十五）

白发三千丈，缘愁似个长。
不知明镜里，何处得秋霜。

皇甫岳云溪杂题·莲花坞

日日采莲去，洲长多暮归。
弄篙莫溅水，畏湿红莲衣。

皇甫岳云溪杂题·鸬鹚堰

乍向红莲没，复出清蒲扬。
独立何褊裊，衔鱼古查上。

皇甫岳云溪杂题·萍池

春池深且广，会待轻舟回。
靡靡绿萍合，垂杨扫复开。

辋川集·孟城坳

新家孟城口，古木余衰柳。
来者复为谁，空悲昔人有。

辋川集·华子岗

飞鸟去不穷，连山复秋色。
上下华子岗，惆怅情何极。

辋川集·文杏馆

文杏裁为梁，香茅结为宇。
不知栋里云，去作人间雨。

辋川集·鹿柴

空山不见人，但闻人语响。
返景入深林，复照青苔上。

越女词（其一）

长干吴儿女，眉目艳新月。
屐上足如霜，不著鸦头袜。

越女词（其三）

耶溪采莲女，见客棹歌回。
笑入荷花去，佯羞不出来。

杜陵绝句

南登杜陵上，北望五陵间。
秋水明落日，流光灭远山。

紫藤树

紫藤挂云木，花蔓宜阳春。
密叶隐歌鸟，香风留美人。

白鹭鸶

白鹭下秋水，孤飞如坠霜。
心闲且未去，独立沙洲傍。

襄阳曲（其一）

襄阳行乐处，歌舞白铜鞮。
江城回绿水，花月使人迷。

襄阳曲（其三）

岷山临汉水，水绿沙如雪。
上有堕泪碑，青苔久磨灭。

辋川集·木兰柴

秋山敛馀照，飞鸟逐前侣。
彩翠时分明，夕岚无处所。

辋川集·临湖亭

轻舸迎上客，悠悠湖上来。
当轩对尊酒，四面芙蓉开。

辋川集·栾家濑

飒飒秋风中，浅浅石榴泻。
跳波自相溅，白鹭惊复下。

辋川集·白石滩

清浅白石滩，绿蒲向堪把。
家住水东西，浣纱明月下。

辋川集·竹里馆

独坐幽篁里，弹琴复长啸。
深林人不知，明月来相照。

辋川集·辛夷坞

木末芙蓉花，山中发红萼。
涧户寂无人，纷纷开且落。

辋川集·漆园

古人非傲吏，自阙经世务。
偶寄一微官，婆娑数株树。

重忆

欲向江东去，定将谁举杯。
稽山无贺老，却棹酒船回。

哭宣城善酿纪叟

纪叟黄泉里，还应酿老春。
夜台无晓日，沽酒与何人？

别东林寺僧

东林送客处，日出白猿啼。
笑别庐山远，何须过虎溪。

九日龙山饮

九日龙山饮，黄花笑逐臣。
醉看风落帽，舞爱月留人。

清溪夜半闻笛

羌笛梅花引，吴溪陇水情。
寒山秋浦月，肠断玉关声。

哭孟浩然

故人不可见，汉水日东流。
借问襄阳老，江山空蔡州。

崔兴宗写真咏

画君少年时，如今君已老。
今时新识人，知君旧时好。

临高台送黎拾遗

相送临高台，川原杳何极。
日暮飞鸟还，行人去不息。

赠韦穆十八

与君青眼客，共有白云心。
不相东山去，日令春草深。

题友人云母障子

君家云母障，时向野庭开。
自有山泉入，非因采画来。